

Ladin, olà vèste?

A conclujon de la setemèna de l'Aisciuda Ladina, n debatit à portà dant valutazions, conscidrazions e proponetes

Poza - "Afficher la langue" dal franzous leteralmente "tachèr fora l lengaz". L'é l'envit vegnù fora fort te la pruma edizion de "Aisciuda Ladina". Da la pruma valutazions a ciaut de coche la é jita la scomenzadiva, portèdes dant con gran capacità da Sabrina Rasom, responsàbola de l'Ofize Servijes Linguistics e Culturèi del Comprenjorie, en ocajion de la meisa torona de conclujon de la pruma setemèna del lengaz ladin, l'é sutà fora n gran besegn de portèr e slarièr fora de più l lengaz ladin anter la jent, soraldut anter i joegn. "L'é n derit, ma ence n doer de na mendranza durèr e stravardèr sie lengaz - à dit Sabrina Rasom - amò de più percheche l lengaz mender l'é n plusvalor." Se l'endesfida é stata venta, se l'Aisciuda Ladina à portà fruc positives se l vedarà più inant. Ma che sie stat na esperienza de valuta che à servì a fèr rejonèr del ladin...ben o mèl... chest l'é segur - l'é stat dit.

Perché pa e per chi fèr politica linguistica?

L moment de debatit se à avert co l'intervent de Evelyn Bortolotti che à portà dant sia reflescions sun "Survey Ladins" dai Ac del conveg n "Doura dl lingaz tles valedes ladines" e subito dò Vigilio Iori à prejentà i dac vegnui fora da la enrescida "Osservatorie di joegn de Fascia" che é stata fata sun n campion de 74 studenc fascegn de la scoles autes de la val o ence foravia.

Da duta doi chesta enrescides se enten l besegn de lurèr coi joegn. "Canche se fèsc zeche - à dit Vigilio Iori - ge vel ge dèr maor visibilità, i studenc sà pech deldut de che che vegn fat o endrezà col lengaz ladin, ge vel ge jir encontra."

Ence te Survey Ladins un di ponc



I reladores a la meisa torona su la politica linguistica che à serà sù l'Aisciuda Ladina.

de debolezza del lengaz ladin l'é proprio la doura te la generazions più joenes apede al schiet sentiment de identità e de partegnuda al mond ladin; a la domana "co te senteste se i te disc che tu es ladin?" i joegn che à tout pèrt a l'Osservatorie à palesà neto n bel festidech. Amò apede, da la enrescida l'é vegnù fora l'idea che l ladin posse ence no esser conscidrà n lengaz.

Perché pa donca e per chi pa fèr politica linguistica? La responeta é tost data. Anter la strategies portèdes dant da Evelyn l'é "pontèr de più sui media e la neva tecnologies, ge dèr visibilità al ladin trèns na maor promozion e distribuzion de prodoc e smaorèr l prestije del ladin soraldut te la generazions di joegn."

Strategies condividudes ence da Marco Stolfo del Servije Identità linguistiches de la Region Friul-Venezia Giulia. "Ge vel fèr entener miec l valor e la oportunitèdes che l lengaz pel dèr ence a nivel profescionèl e economich - à dit Stolfo - e te la produzion de material linguistich vardèr de slarièr fora i setores, portan de più l ladin, per ejempie, tel sport, se se vel che l vegne durà dai joegn." Obietives che en pèrt é stac arjunc da chesta pruma Aisciuda Ladina soraldut

col bel suzess de la maratona de letura a chela che à tout pèrt na sessantina de jent, da la scola en sù, e l'é stat metù ensema béleche 10 ores de registrazion. Chest l'é stat l moment più populèr - à dit Sabrina - che à abù maor éjit anter la jent. Na scomenzadiva che aessa podù garatèr amò de più - à sotlineà Fabio Chiocchetti, moderador del debatit - se se fossa stac bogn de fèr ruèr la registrazion tel medemo moment te n muie de lesc desferenc de la val, roba che anchecondi la tecnologia permet. Aboncont chesta "Aisciuda Ladina" - à dit l dirigent del Servije Mendranzes de la Provinzia de Trent Marco Viola - che gio traslatasse più desche "risveglio" che desche "primavera", me à sapù na scomenzadiva de gran emportanza, ajache l'à sapù creèr sinergia e l'à desmostrà che l'é amò n muie de jent che creit te l'emportanza de n lengaz mender e che vel l rejonèr.

Lurèr donca de più co la jent, anter la jent, te la emozionalità de la persones. Percheche l lengaz ladin vegne dalbon "tacà fora". E sun chest troi l'é ence i projec del T9 per ladin per i fonins e i papieres di ofizies anagrafes tant per talian che ladin. Ma n muie l'é amò da fèr. (mci)